

मार्निंग डोगरी न्यूज़ बुलेटिन, समें. 09-20 Hrs

<><><><><><>

## Headlines

- संसद दा बजट इजलास अज्जै कोला शुरू। खजाना मंत्री निर्मला सीतारमण अज्ज लोकसभा च आर्थिक सर्वेक्षण पेश करगंन।
- प्रधानमंत्री नरेन्द्र मोदी कारगिल युद्ध दी जित्त दे 25 ब'रे सबूरे होने पर दलेर सैनिकें गी श्रद्धांजलि अर्पित करने लेई 26 जुलाई गी द्रास आँगन।
- जम्मू कश्मीर दे उपराज्यपाल मनोज सिन्हा होरें अपने माहवार रेडियो प्रोग्राम च कारगिल युद्ध दे नायकें गी श्रद्धांजलि अर्पित कीती।
- कल 9 ज्हार शा बी मते श्रद्धालुएं बाबा अमरनाथ जी दी पवित्र गुफा च मत्था टेकेआ, 23एं दिनें च तकरीबन 4 लक्ख श्रद्धालु यात्रा मुक्कमल करी बैठे दे न।

<><><><><><>

## Budget Session

संसद दा बजट इजलास अज्जै थमां शुरू होआ'रदा ऐ जेहड़ा औंदे म्हीने दी 12 तरीक तोड़ी जारी रौहग। इस केहड़े इजलास च कुल 16 बैठकां लग्गंन ते 2024-25 ब'रे दा पूरा बजट बी पेश कीता जाग। साढ़े संवाददाता मूजब अज्ज पैहले रोज केन्द्री खजाना मंत्री निर्मला सीतारमण होर 2023-24 ब'रे दा आर्थिक सर्वेक्षण पेश करगंन ते कल मंगलवारें ओ लोक सभा च 2024-25 लेई बजट पेश करगंन। कल गै जम्मू कश्मीर केन्द्र शासत प्रदेश दा बजट बी पेश कीता जाग। इस इजलास दरान मेद ऐ जे सरकार 6 नमें बिल बी पेश करोग। कल सरकारै सब्बने पार्टिएं दी बैठक सदियै उंदे कोला संसद दी कारवाई रमानदारी ते बवस्था आले ढंगै सिर चलाने च सैहयोग मंगेआ।

<><><><><><>

## PM Drass

प्रधानमंत्री नरेन्द्र मोदी होर 26 जुलाई गी कारगिल विजय दिवस दी 25मीं ब'रेगंड दे मपौके पर कारगिल जांगन ते युद्ध स्मारक पर भारत दे वीर सैनिकें गी श्रद्धाजलि भेंट करगन। प्रधानमंत्री हुंदे इस दौरे दी तस्दीक करदे होई अधिकारिएं दस्सेआ ऐ जे लद्दाख दे उपराज्यपाल ब्रिगेडियर रटैर बी.डी.मिश्रा होर 26 जुलाई गी प्रधानमंत्री हुंदे दौरे लेई। तैआरिएं दा जायजा लैने लेई 24 तरीक द्रास जांगन। मेद ऐ जे सीडीएस ते त्रौनें सेनाएं दे प्रमुख पैहले गै प्रधानमंत्री हुंदी अगुवानी करने लेई उत्थें पुज्जी जांगन ते कारगिल विजय दिवस समाराहें च शिरकत करगन। हर ब8रे 26 जुलाई गी द्रास युद्ध स्मारक पर कारगिल विजय दिवस मनाया जंदा ऐ। 1999 च अज्जै दे रोज भारतीय फौज नै वायु सेना दे सैहयोग कन्नै चलाई गेदी कारवाई च उत्थें आई बड़े दे पाकिस्तानी फौज दे घुसपैठिएं गी उत्थुआं नसाइयै अपने इलाके अपने इलाके गी खाली करोआया हा। कोई त्रै म्हीने तोड़ी चले दे इस युद्ध च साढ़े 500 दे करीब सैनिक शहीद होइ गे हे। तोआई 8 माउनटेन डिवीजन दे जीओसी मेजर जनरल सचिन मलिक होरें लद्दाख दे उपराज्यपाल होरें गी प्रधानमंत्री हुंदे द्रास दौरे बारे कीती जा'रदिएं तैआरिएं बारे जानकारी दिक्ती।

<><><><><><>

## LG-AKA

उपराज्यपाल मनोज सिन्हा होरें कल कारगिल युद्ध दे नायकें गी श्रद्धाजलि भेंट कीती ते म्हीने म्हीने प्रसारत होने आले रेडिया प्रोग्राम अवाम की अवाज गी उनें युद्ध नायकें दे नमित कीता। हर म्हीने दे त्रिए ऐतवारें प्रसारत होने आले इस कार्यक्रम गी संबोधत करदे होई मनोज सिन्हा होरें आखेआ जे कारगिल विजय दिवस साढ़े सेना दी शामन, हिम्मत, दलेरी ते देसै लेई अपना सब किश कुर्बान करी देने दे जज्बे दी गौरव गाथा गी दर्शा'दा ऐ। उनें आखेआ जे ओ सब्बने सैनिकें ते सुरक्षाबलें दे जवानें गी नमन करदे न जिंदे करी साढ़ा मुख्य पूरी चाल्ली सुरक्षत ऐ ते तरक्की दी बत्तै पर अगड़े बधै करदा ऐ। इस रेडिया कार्यक्रम च उपराज्यपाल होरें केन्द्र शासत प्रदेश दे केई सारे लोकें दिएं प्रेरणा देने आलिएं कहानिएं गी बी श्रोताएं कन्ने सांझा कीता जेड़ियां बड्डे बदलाव आहन्नने आलियां साबत होइयां। उनें महत्वपूर्ण विषयें बारे जागरूकता अभियानें दी सराहना कीती जिंदी बदोलत जमीनी सतह पर लोकें दा सशक्तिकरण जकीनी बनेआं उपराज्यपाल होरें मुश्ताक बी बर्क उंदे आस्सेआ मन्ने परमन्ने दे कविएं दिएं अहद जरगर ते रहमान राही हुंदी रचनाएं दे अनुवाद आलिएं कताबें "जर्फ जरगर" ते "एक्सप्लोरिंग विमल'ज राह" दा विमोचन बी कीता।

<><><><><><>

## Rajouri Search

राजौरी जिले च सुरक्षा बलें गुंधा इलाके च इक तुपाई अभियान शुरू कीते दा ऐ। अज्ज बडलै मूह नहेरे कोइ 4 क बजे संदिग्ध आतंकवादिएं इक सुरक्षा चौकी पर फौर कीता जेहदे पर उत्थें तैनात सुरक्षा कर्मिं मोर्चा साम्भदे होई जवाबी कारवाई कीती। किश देर तोड़ी दौनें तरफा गोलीबारी चली। अधिकारिक सूत्रें मूजब फिलहाल इलाके गी घेरी लैता गेदा ऐ ते तुपाई जारी ऐ। जानकारी मूजब एहदे शा पैहले अज्ज गै बडलै 3 बज्जियै 10एं मिंटे पर गुंधा च आतंकवादिएं इक वीडिीसी मिंबर दे घरै पर हमला कीता। ओहदे लागे गै तैनात फौज दी टुकड़ी नै एहदे प्रतिक्रिया दिंदे होई जवाबी कारवाई कीती। फौज दी वहाईट नाईट कोर दी इक सोशल मीडिया पोस्ट पर जानकारी दित्ती ऐ जे कारवाई अजें तोड़ी जारी ऐ। जम्मू च सेना प्रवक्ता नै जानकारी दित्ती ऐ जे राजौरी दे दूर दरेड़े ग्रां च फौजी चौकी पर हमले गी नकाम करी दित्ता गेआ ऐ। रूकी रूकियै गोलीबारी होआ'रदी ऐ, होर ब्यौरे गी बलगेआ जा'रदा ऐ।

<><><><><><>

## Chief Secretary

मुख्य सचिव अटल डुल्लू होरें कल सिविल सचिवालय च इक बैठक दी अध्यक्षता दरान जम्मू कश्मीर च किसान खिदमत घरें दी स्थापना दा जायजा लैता। श्री डुल्लू होरें दस्सेआ जे किसान खिदमत घर, करसानें दी मदाद करने आले सेवा केन्द्र न जिंदा मकसद इकै थाहर, हर जरूरी सेवा मुहैआ करोआइयै कृषि-सहायता सरिस्ते च क्रांति आन्नना ऐ। उनें सब्बने डिप्टी कमीशनरें गी कृषि उद्यमिं दी फेहरिस्त जारी करने लेई आखेआ तां जे अगस्त म्हीने दे पैहले हफते तगर कृषि खिदमत घरें गी कम्म करने जोग बनाया जाई सकै।

<><><><><><>

## Mission Shakti

मिशन शक्ति संकल्प तैहत समाज कल्याण विभाग आस्सेआ कल जम्मू दे बीटीसी केन्द्र खंडवाल च भारती न्याय संहिता च महिलाएं पर केन्द्रित प्रावधानें बारे जागरूक करने लेई इक जागरूकता सतह आयोजित कीता गेआ। इस सतह दा मुख्य मकसद महिलाएं गी भारती न्याय संहिता च महिलाएं दे हितें आले प्रावधानें बारे जागरूक करना हा।

<><><><><><>

## Amarnath Yatra

कल 9 ज्हार शा बीमते श्रद्धालुएं पवित्र अमरनाथ गुफा च बर्फू दे बने दे हिमलिंग दे दर्शन कीते। पिछले 23एं दिनें च 3 लक्ख 95 ज्हार 977 श्रद्धालुएं बर्फू दे बने दे शिलिंग दे दर्शन कीते। ताई अज्ज बडलै 3 ज्हार 471 श्रद्धालुएं दा 25मां जत्था बडलै भगतवी नगर आले आधार शिविर थमां 114 गड्डिडएं दे काफले च खाना होआ। इस जत्थे च 2 ज्हार 620 मर्द, 720 महिला, 3 बच्चे, 93 साधु, 34 साध्वियां ते 1 ट्रांसजेंडर शामिल ऐ।

<><><><><><>

## Advisor Yatra

उपराज्यपाल हुंदे सलाहकार राजीव राय भटनागर होरें कल चंदनवाड़ी आधार शिविर दा दौरा लाया ते चला'रदी पवित्र श्री अमरनाथ यात्रा लेई कीते गेदे प्रबंधें दा जायजा लैताप। इस दरान सलाहकार भटनागर होरें श्रद्धालुएं दी यात्रा सखल्ली ते सैहल करने लेई दित्ती जा'रदिएं सहूलतें दा व्यापक जायजा लैआ। सलाहकार होरें यात्रा आयोजित करने आले सब्बने बक्ख-बक्ख घडें ते संगठनें दी सराहना कीती ते प्रशासन आस्सेआ श्री अमरनाथ जी दी यात्रा पर आए दे श्रद्धालुएं लेई उंदी यात्रा यादगार बनाने लेई हर मुमकन सहूलत देने दे धैइयै गी फही पक्का कीता।

<><><><><><>

## Milk Processing Unit

पूरे पराते कृषि विकास प्रोग्राम दे इक हिस्से दे तोर पर स्वयं सहायता ग्रुपें ते करसान उत्पादन संगठनें दी सहायता लेई कल बंटेरना किशतवाड़ च दुधै गी डब्बाबंद करने आली इस नमीं युनिटै दा उदघाटन कीता गेआ। डिप्टी कमीशनर किशतवाड़ डॉ. देवांश यादव होरें परियोजना दा उदघाटन कीता। भलेआं अज्जै कल्लै आली इस युनिटै दी समर्थ 12 सौ लीटर दुधै गी फही घैंटा डब्बाबंद करने दी ऐ। इस पैहलकदमी कन्नै स्थानीय लोकें दी आंदन च बाद्धा दर्ज कीता जाई सकोग।

<><><><><><>

## RSS Ban

केन्द्र नै सरकारी कर्मचारिएं पर राश्ट्रीय स्वयं सेवक संघ-आरएसएस दी गतिविधिएं च हिस्सा लैने पर लग्गे दा प्रतिबंध हटाई लैता ऐ। नवम्बर 1966 च उसलै दी प्रधानमंत्री इंदिरा गांधी हुंदे शासनकाल दरान कार्मिक मामलें, जन शकैत ते पैशन सरबंधी मंत्रालय आस्सेआ हआया गेआ ऐ।

बीजेपी दे आईटी सैल दे प्रमुख अमित मालवीया होरें सोशल मीडिया प्लेटफार्म एक्स पर लिखेआ ऐ जे अज्ज कोला 58 ब'रे पैहले सरकारी मलाजमें दे आरएसएस दिएं गतिविधिएं च हिस्सा लेने पर लाई गेदी बंदश गी मोदी सरकार आस्सेआ बिजन शर्त परताई लैता गोआ ऐ। केई राज्यें दिएं सरकारें जिंदे च हरियाणा, हिमाचल प्रदेश, मध्यप्रदेश ते छत्तीसगढ़ शामिल न, उनें पैहले गै सरकारी मलाजमें परा एह पाबंधी हआई दित्ती दी ऐ।

<><><><><><>

## Army Drugs

भारती सेना नै नैली राजौरी च किशोरें गी नशीली दोआइएं खलाफ जागरूक करने लेई इक व्याख्यानद आयोजन कीता। स्थानीय लोकें गी नशीली दोआइएं दे माड़े प्रभावे बारे जागरूक कीता गोआ जे कियां एह जीवन ते परोआर गी नश्ट करदियां न। इस दरान तम्बाकू नोशी खलाफ बी लोकें गी जागरूक कीता गोआ जेहड़ा मुंहै दे कैंसर दा बड़ा बड़्ढा कारण ऐ।

<><><><><><>

## Plastic Waste Management

जम्मू कश्मीर दे ग्रामीण विकास ते पंचैती राज विभाग दे ग्रामीण विकास निदेशालय आस्सेआ कल प्लास्टिक रैंद-खैंद दे प्रबंधन बारे मास्टर ट्रेनरें लेई यूटी सतह दी इक सिखलाई कार्यशाला दा आयोजन कीता गोआ। इस कार्यशाला दा मकसद इक साफ शफाफ ते टिकाऊ पर्यावरण लेई प्लास्टिक रैंद-खैंद दे असरदार प्रबंधन बारे मास्टर-ट्रेनरें गी व्यापक ज्ञान ते हुनर कन्नै लैस करना हा।

<><><><><><>

## SWD BBBP

जिला समाज कल्याण विभाग रामबन आस्सेआ कल चनां दरेया दे कंडे बेटी बचाओ बेटी पढ़ाओ प्रोग्राम तैहत रेतू दी इक प्रभावशाली कलाकृति दी स्थापना कीती गई। इस पैहलकदमी दा मकसद महिला सशक्तिकरण ते कुड़िएं दी शिक्षा बारे जागरूक करने दे कन्नो कन्नी पर्यावरण दी सांभ सम्भाल गी बढ़ावा देना बी हा। केइएं नोजवान स्वयं सेविएं इस पैहलकदमी च हिस्सा लैता।

<><><><><><>